



10. september 2018

UKA 2018/165

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Nuna tamakkerlugu kulturikkut kingornussarsiat suussusiinik aalajangersaasussanik UPA2019-mut suleqatigiissitaliornissaannik kulturikkullu kingornussarsiat kingusinnerpaamik 2021-mi saqqummiutassatut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

### **Tunngavilersuut:**

Nunarsuarmioqatigiit akulerukkaluttuinnarfiini ileqqutoqqat eriagisariaqartut sukkasuumik tammariartorput. Inuiaqatigiit kalaallit immikkut kinaassuseqarnerat pigiinnarneqassaguni erseqqissumik suussusersineqarluni ingerlateqqinneqarsinnaanngortinneqartariaqarpoq. Suleqatigiisitallu marluunissaat siunnersuutigivarput, kulturikkut ileqqutoqqanit kingornussarsiat nalinginnaasut pillugit, kiisalu kulturikkut kingornussat tigussaangitsut pillugit suleqatigiisitaq.

Maanna ukiut qulit qaangiussimalerput kulturikkut kingornussarsiat (kulturkanon) suliarineqarnissaat pillugu Inatsisartut oqallinneranniit (akuersissuteqarneranniillu). Taamaammat isummap taassuma piviusunngortinnissaanut piffissanngorpoq taamaalilluta nammitsinnik oqaatsivut atorlugit kulturikkut oqaluttuassartatta oqaluttuarineqarnerani annerusumik peqataasinnaanngussagatta.

### Kulturikkut kingornussarsiat nalinginnaasut pillugit suleqatigiisitaq.

Kulturikkut kingornussarsiat (Kulturkanon) nalinginnaasumik ilisimaneqartussat suunersut pillugit suleqatigiisitaq pilersinneqartariaqarpoq, taakkulu siunnersuuteqassapput.

Tamakku tassaasinnapput atuakkiat, qalipakkat, sanalukkat, illulioriaatsit, angallasioriaatsit.

### Kulturikkut kingornussarsiat tigussaangitsut pillugit suleqatigiisitaq (intangible cultural heritage)

Kulturikkut kingornussarsiat tigussaangitsut sorliit aammalu qanoq tammatsaalineqarnissaannik siunnersuusiussaaq. Kingornussarsiat tamakku makkununga tunngassuteqarsinnaapput: pinnguaatit, nipilersoriaatsit, pileriaatsit, timersuutit, sanariaatsit, piniariaatsit.

Pingaaruteqarpoq erseqqissassallugu suliame matumani eqqaamaneqassammat inuiaqatigiit kulturiat uumassuseqarmat allanngorartuarlunilu aammalu avataaniit tigusatsinnik sunnigaasarmat, taakkulu aamma naliliinermi ilanngunneqassammata. Taakkuttaaq kinaassutsitsinnut ilaapput massakkullu

# INUIT ATAQATIGIIT

## Inatsisartuni



kultur-erilikkatsinnut ilanngussimallutik. Eqqumaffigineqassaaq kulturi uninngaanartuunngimmat allannorartuarmalli kiisalu minnerunngitsumillu qangaaniit ileqqutsinnik tammatsaaliiviummat.

Suleqatigiissitat kattuffinnik, eqqumiitsuliortunik, oqaluttuarisaanikkullu ilisimasalinnik allanillu attuumassuteqartutut isigineqartunik inuttaqarsinnaapput.

Kulturikkut kingornussarsiat imarisaat kulturitta kulturikkullu kingornussarsiatta oqaasertalersornerani atorsinnaavavut. Kulturikkut kingornussarsiat suussusiinik saqqummersitsinikkut tamanna pisinnaavoq, aammali kulturikkut kingornussarsiat meeqqat atuarfianni, ilinniarnertuunngorniarnarfinni kiisalu ilinniarnarfinni allani atorineqarsinnaapput.

Kingornussarsiat tigussaangitsut tammatsaalineqarsinnaapput soorlu ilinniarnarfinni naleqquttuni ilinniartitsissutigineqartarnerisigut, atuakkiarinerisigut, isiginnaagassiarinerisigut.

Suleqatigiissitat kattuffinnik, eqqumiitsuliortunik, oqaluttuarisaanikkullu ilisimasalinnik allanillu attuumassuteqartutut isigineqartunik inuttaqarsinnaapput.

### **Pisortanut aningaasatigut allaffissornikkullu kingunerisassai:**

Suleqatigiissitaliornerup piareersarneqarnera annerpaamik allaffimmiup AC-ip ukiup sisamararterutaani sulineranik naleqassasoq, tassani 125.000 kr.-inik naleqassasoq naatsorsuutigineqarpoq.

Siunnersuutigineqarpoq suleqatigiissitat taakku marluk ukiut marluk tikillugit sulissasut. Suleqatigiissitat tamarmik immikkut 500.000 kr. -inik aningaasartuuteqarfiussasut missingerneqarpoq, tassa ukiumut 250.000 ukiuni marlunni, katillugit 1 million kr-it. Tamatuma saniatigut naatsorsuutigineqarpoq Naalakkersuisut allattoqarfeqarnikkut ikiuutissasut, sulineq taanna suleqatigiissitat inassuteqaateqarneratigut kulturikkut kingornussarsiat suliarineqarnerisa saniatigut allaffiup AC-ip ukioq ilivitsaq tikillugu sulineranik naleqassaaq, tassa 500.000 kr.

Aammattaaq kulturikkut kingornussarsiat saqqummiunneqarnerat aningaasartuuteqarfiussaaq, apeqqutaassaarli qanoq saqqummiunneqarnerisut - qarasaasiakkoorlugit imaluunniit naqitanngorlugit. Saqqummersitsinermulli aningaasartuutit minnerpaamik 100.000 kr.-iussangatinneqarput.

### **Namminersortunut aningaasaatigut allaffissornikkullu kingunerisassai:**

Soqanngilaq

### **Innuttaasunut aningaasatigut allaffissornikkullu kingunerisassai:**

Soqanngilaq.